



**Äntwert vum Här Sportsminister op d'parlamentaresch Fro n° 7526 vum 30. Januar 2023  
vum honorabelen Deputéierten Här Sven Clement**

**1. Wat fir finanziell Hëllefën si fir Sportevenementer 2023, déi fir Sportler a Sportlerinne mat Aschränkungen am In- an Ausland organiséiert ginn, virgesinn? Wat ass zum Beispill un Hëllefën (finanziell oder anerer) fir d'"Special Olympics World Games" zu Berlin virgesinn?**

All unerkannte Sportfederatioun huet Urecht drop fir finanziell Bähëllefë vum Sportsministère kënnen ze kréien. Hei gëtt a kenger Hisiicht een Ënnerscheid gemaach. Wat d'Associatioun vun de Special Olympics (ALPAPS) ugeet, ass et esou datt si eng unerkannte Federatioun sinn, déi och am COSL ass, sou datt si op finanziell Hëllefën zeréckgräife kann.

Allerdéngs hu mir och festgestallt, datt zënter dem Joer 2015 d'Special Olympics (ALPAPS) keng Demande méi fir e Subside eraginn hunn. Wéi si hir Deplacementer op déi jeeweileg Veranstellungen finanzéieren ass dem Sportsministère net bekannt. Dem Sportsministère läit also keng Demande fir d'Special Olympics World Games vu Berlin vun dësem Joer vir.

Niewent de Bähëllefë fir Eventer, accordéiert de Sportsministère awer och nach de Congé sportif. Heizou stelle mir fest, datt d'Special Olympics, fir d'World Summer Games, déi am Joer 2019 zu Abu Dhabi an de Vereenegten Arabeschen Emiraten (VAE) statt fonnt hunn, eng Unzuel vu 430 Deeg Congé sportif fir hir Sportler a Betreier accordéiert a bezuelt kritt hunn.

Dës 430 Deeg Congé sportif déi d'Athleten an d'Accompagnateure vun de Special Olympics (ALPAPS) fir dëst Event zu Abu Dhabi kritt hunn, beleeft sech op eng Héicht vu 66.356,25€ a sinn deemno un déi jeeweileg Arbeitgeber rembourséiert ginn.

**2. D'ALPAPS huet 653 Sportler a Sportlerinne mat Lizenzen, ass awer nëmme mat ronn 19'000€ Budget ënnerstëtzt ginn. Aner Organisatioune wéi de Rugby mat 689 Lizenzen, konnte vu ronn 94'700€ profitéieren. Duerch wat kommen esou grouss Ënnerscheeder?**

Den isoléierte Verglach tëschent der Fédération luxembourgeoise du Rugby an de Special Olympics (ALPAPS) kann een esou net maachen.

De Rugby huet Kompetitiounslizenzen, déi et jo an deem Moossen am mental behënnerte Sport net ginn. De Rugby huet héich Käschte schonns eleng duerch d'Qualifikatiounsmatcher, souwéi och duerch aner international Rendez-vous'en, respektiv och Preparatiounsstagen.

An dësem Kontext kann een nach erwänen, datt d'Special Olympics (ALPAPS) ee Subside vun 8.700€ fir hir frais de Fonctionnement kréien. Derbäi kënn nach de Finzement vun 1,5 ETP (Équivalent temps plein) fir hiren DTN (directeur technique national) souwéi eng hallef Tâche fir de Sekretärsposten an dëst deemno an enger Héicht vu 60.267€. Och op deem Wee ënnerstëtzt de Sportsministère déi national Sportfederatiounen, an do ass d'Special Olympics (ALPAPS) och keng Ausnam.



**3. Ass de Minister der Meenung, dass sportlech Organisatiounen, déi Offere fir Leit mat Aschränkungen ubidde, staark genuch ënnerstëtzt ginn?**

Wéi schonns méi uewe beschriwwe kritt d'Special Olympics (ALPAPS) genee déi selwecht Ënnerstëtzung wéi all déi aner agreéiert Sportverbänn och. Als Sportminister sinn ech souwisou a reegelméissegem Ofstänn am direkten Dialog mat de Verbandsresponsabelen. Sou hat ech de 27.04.2022 eng Reunioun mat de Responsabele vu Special Olympics (ALPAPS) fir op hir Doleancen anzegoen. Souwuel d'Special Olympics (ALPAPS), wéi och de Luxembourg Paralympic Committee, déi sech jo alle béid fir Leit mat Aschränkungen asetzen, kréie vum Sportsministère op alle Fall déi selwecht finanziell Ënnerstëtzung wéi all déi aner Federatiounen och.

**4. Hänken d'Hëllef, déi dës Organisatiounen ubidden, vun de sportleche Resultater vun de Sportler a Sportlerinnen of? Wa jo, denkt de Minister net, dass et dat falscht Signal ass, fir hei d'Leeschtunge fir méi wichteg unzegesi wéi de soziale Benefice, deem dës Federatioune bréngen.**

Wéi schonns méi uewe beschriwwe sinn déi finanziell Hëllef net un Resultater gebonnen, mee un d'Envergure vu den nationalen a internationale Competitiounen an Optrëtter, an deemno déi finanziell Engagementer vun enger Federatioun.

**Luxembourg le 2 mars 2023**

Le Ministre des Sports

(s.) Georges Engel